


張季直文鈔卷一



戊戌

六君子

遺集

中國毛邊紙精印

鉛版大字本

全部分訂六冊

定價一元二角

◎商務印書館發行

此書爲戊戌就義六君子之遺著。

若瀏陽譚復生所著寥天

一閣文。莽蒼蒼齋詩。遠遺堂集外

文。侯官林瞰谷晚翠軒集。

綿竹楊叔嶠說經堂詩草。

富順劉光第介白堂詩集。

聞喜楊深秀雪虛聲堂詩

鈔及奏稿。南海康幼博遺

詩等。各稿皆散佚四方

極不易得。本館費數年之

力始得合印成帙。崇拜六君子

者。當以先睹爲快也。

張季直文鈔卷一目次

徐州應建行省議

豫計地方自治經費釐訂地方稅界限應請開國會議

擬請提議照約速定裁釐加稅請祕密會議

代表張弧景學鈐上大總統國務總理條議

江蘇測繪輿圖議

請免提蘇屬積穀款仍留地方辦學議

變通通九場鹽法議略

豫備資政院建議通改各種鹽法草案

鹽業改良後議

衛國卹民化梟弭盜均宜變通鹽法議

復淮濬河標本兼治議

學制宜仿成周教法師孔子說

兒子怡祖字說

獎勵植棉暨紡織業說

通州師範學校始建記

博物苑美人石記

重修臨淮廣運橋記

養老院記

致孫少侯王鐵珊書

致鐵良書

張季直文鈔卷一

徐州應建行省議

控淮海之襟喉。兼戰守之形便。殖原陸之物產。富士馬之資材。其地爲古今主客所必爭者。莫如徐州。今天下大勢。英之兵艦梭織於長江。德之鐵路午貫於山東。謀蔽長江。則勢力必擴而北。謀障山東。則勢力必擴而南。南北之際。徐爲中權。平原蕩蕩。千里無垠。俗儉而饑。民強而無教。犯法殺人。盜劫亡命。梟桀之徒。前駢死而後踵接者。大都以徐爲稱首。近數十年。復有會匪之勾結。教士之浸灌。設不早計。禍發一隅。牽動全局。將欲因時制宜。變散地爲要害。莫如建徐州爲行省。試考諸古。禹貢徐州。北至岱。南至淮。東至海。西錯兗豫。今江蘇之海州。山東之沂州。濟寧及兗州之半。皆徐州域。沂泗汶汴與淮爲緯。其地則北走齊魯。南瞰吳楚。東阻大海。西通梁宋。自漢室紛更。徐當許洛孔道。最爲多事。晉人南渡。特置重鎮。恆以彭城之得失。繫南北之盛衰。後周取之以臨淮南。朱溫爭之以阻行密。魏尉元曰。

彭城宋之要藩。不有重兵積粟。不可固守。若積儲既廣。宋人必不敢窺淮北。陳顧野王曰。彭城地形都要。不特捍蔽南國。爲必爭之地。自昔東南用兵。莫不由此。以臨諸夏。李泌陳無已蘇軾規畫江淮。亦莫不注重徐州。至於沂濟歸睢鳳潁海泗。雖同爲中原腰膂。而以分率準望測之。但能經營徐州。蔚爲雄藩。皆可以左提而右挈之矣。以輿圖分率準望約略計之。徐州府領銅山蕭碭山豐邳沛宿遷睢寧一州七縣。益以海州之沐陽贛榆。淮安之安東桃源。安徽鳳陽之宿靈璧。潁州之蒙城渦陽。亳州泗洲之五河盱眙天長。山東沂州之蘭山郯城費莒沂水蒙陰日照。兗州之滕嶧。濟寧之魚台金鄉。曹州之曹單城武。河南歸德之商邱虞城寧陵鹿邑夏邑永城睢考城拓城。凡四十五州縣。惟沂州泗州歸德全析。餘皆分析。與曾國藩駁陳廷經請江南北分省不同。明季計東籌守兩淮。必先守徐泗。以爲清渦潁三口之門戶。同治初潘祖蔭請就徐州四界司設總兵兵備道。凡江蘇安徽山東河南四省沿邊州縣。悉歸管轄。作爲重鎮。顧當時之所爲患者。我失所無教。

之民盜弄潢池兵已耳。今之大患。自外而內。駸駸焉。英將由長江而北。規德將由濟南而南。越各逞其強。各均其勢。得寸得尺。而欲以一道數州縣之力。一鎮之兵。冀其相抵相角。其必無倖。奚待智決乎。夫一鎮一道之施設。在中原有事。草竊橫行之日。猶可枝梧也。其在今日。非建行省設巡撫。則斷乎不可。大抵建徐州爲行省。有二便四要。海運通鐵路。卽達。輸輓不絕。漕督可裁。未盡事宜。以徐州巡撫兼之。原有厘金。協餉。葦蕩所入。以養標兵者。一轉移間。亦可資挹注。升徐州道爲布政司。援鎮迪道加按察司銜例。以淮海道兼臬事。增官不必添員。便一。徐海淮泗沂濟鳳穎民氣。雖不盡同。較其大略。樸嗇勁悍。苟就募萬人。簡而練之。作爲游擊步隊六千。馬隊四千。仿美制鄉村鎮堡練習民兵。但使統馭得人。訓練有方。比及三年。可幾有勇。又河灘海墾。荒地遼闊。闢場牧馬。足備戎需。廣殖豐林。足資防禦。便二。廣種薄收。農情成習。蒿萊滿目。棄貨益多。况山童野濯。河廢湖淤。宜樹宜藝。遠尋楚漢陂屯之遺。近采靳輔溝田之議。大開農場。示以試驗。人歆於利。效法必

多。故訓農爲一要。農旣生物。待工而成。徒恃舊工。不可以盡物利。徒適陋俗。不可以塞漏卮。利國礦產。載在方志。石煤之富。近益彰明。就產設廠。可造槍炮。可造農工一切應用機械。食用旣節。工資亦省。因麥以磨麵。因豆以榨油。因粱粟以釀酒。因油蠟以製燭皂。因牛羊皮以練革。因蠶以良綢帛。因砂以爲玻璃。或自無而有。或自粗而精。俱可相度土宜。生財利用。原料成熟。人漸於勤。故勤工爲一要。無水利無以利農。則湖河宜闢。水之大者。曰淮。曰沭。曰沂。曰泗。曰濬。曰漣。曰豐。曰睢。曰渦。湖之大者。曰碩項。曰桑墟。曰成山。曰青冢。曰張莊。曰呂孟。曰微山。曰赤山。曰昭陽。曰青伊。曰駱馬。曰倉基。曰雁麥。曰連汪。曰峯山。河之大者。曰泡河。曰薛河。曰伽河。曰彭河。曰澮河。曰沱河。曰潼河。曰武河。曰薔薇。曰白洋。以上均統所規畫之界內而言。無運道無以利工商。則鐵路宜築。輪船宜行。無電報無以利工商。尤無以利兵。則支線宜次第連屬。無資本無以利工商。亦無以利農。則銀行宜大小貫輸。故通商爲一要。農工商兵皆資學問。專科之始。尤重普通。有普通而後可宣上德。

有普通而後可肇國民。宜省先立一師範學校。縣各立一初等小學校。是二校者。皆宜官貲。官既倡之。政用強迫。手工徒弟。學亦宜先。庶幾標本兼圖。緩急不匱。民智苟啓。民生自昌。國不患貧。何至愚弱。故興學爲要中之尤要。然亦有三難。固塞之區。有同草昧。百道並進以舉事。一日千里以致思。非忠非勤。非廉非信。非強立嚴毅。不能植基。不能圖成。則得巡撫難。政需人舉。人需學造。專科成家。全國無幾。必溝通新舊妙識機宜之才。乃能共開物成務錯節盤根之業。則巡撫得人難。練兵須財。製造須財。補助農工商實業須財。多宜五百萬。少必三百萬。國帑既窮。民力尤絀。則籌款難。論者苟以外患內憂爲無傷。徐州之行省。尙可不建也。則二便四要。誠不敵三難。而鑒於二便四要而以爲不得不建也。有人有財。雖有三難。直可旦夕舉之。昔人言守長江者必先守淮泗。規山東者必取道徐海。此固爲有長江與山東者言之。今英德已入吾室而操吾戈。與吾共長江山東之利矣。然則能爲山東之利害者何地。以淮制江者何地。寧有以易吾徐州之說乎。易曰。王公設

險以守其國。周書曰。慎固封守。春秋楚戍彭城。所以塞吳晉之通。晉城虎牢。所以阻鄭楚之合。詹嘉備秦人而守桃林。女寬備子朝而守闕塞。可爲知設險者矣。春秋莫強於秦。其入郢也。歷晉地五百餘里以與楚爭。而晉人不知禁。其襲鄭也。歷周晉山谷二千餘里以薄偃師。而周晉人不知詰。主無固圉之謀。敵得無人之境。不知設險。效乃至斯。一秦且不可。而况置兩秦於吾肘腋之間。如之何不虞不備乎。吾懼徐州不日龍爭而虎鬥。迭進迭退。芒碭大澤。我之伏莽梟徒。又乘機竊發。或不免舉足左右。以爲敵用。爲東三省之續也。故爲此議。

豫計地方自治經費釐訂地方稅界限應請開國會議

自朝廷宣布立憲詔旨。明定九年豫備期限。於是十一部之新政。次第頒布。責成地方官。督促各地方紳士進行。光緒三十四年十二月二十七日上諭頒布城鎮鄉地方自治章程。以地方自治爲立憲之根本。城鎮鄉又爲自治之初基。著民政部及各省督撫督飭所屬地方官選擇正紳。按照此次所定章程。將城鎮鄉自治

各事宜。迅卽籌辦。實力奉行。不准稍有延誤。諄諄訓示。又申儆之曰。選舉自治之職員。責在州縣。選舉州縣。責在督撫。終儆以毋得始勤終懈。致誤實行立憲之期。仰見孝欽顯皇后德宗景皇帝期望立憲之殷。皇上繼志述事之盛。薄海人民。孰不感奮。矧在稍有知覺之倫。惟按章程自治範圍第五條下所列之第六款。各方有原已舉辦者。有甫經創辦者。有尙待籌辦者。有不能強辦者。原辦之事。或須改良。或須推廣。甫辦之事。或須繼續。或須維持。無一不資財政。至於籌辦之事。則尤在原有及甫有各事所需財政之外。年年須辦。卽年年須籌。而地方原有之公款公產。多繫屬於地方原有之事。所有甫辦之事。大概出於另籌者十之七。出於移用者十之三。公款有恨。挹注已窮。義士輸捐。將伯殆徧。而自治待舉之要事。相逼而來。自治經費之問題。茫無所向。各國地方自治經費。其所取給在地方稅。稅則既未規定。地方不容有違法之取。取給既無處所。地方何從得自治之資。嘗通州人也。請舉通州爲例。除特設之測繪局。特籌之江岸工程外。如自治範圍第五

條之第一款爲學務。通州於光緒二十七年卽設初級師範學校。二十九年始設初等小學校。三十一年始設高等小學校。宣統元年始設中學校女師範學校。以本年爲斷。凡已成之初等男女小學校七十處。男女高等小學校四處。師範三處。中學一處。如期教育普及。須更分區建設。按戶籍人數。學部章程。明定五年後。每二百戶一初等小學。應增七百二十五處。按輿圖方里。每十六里一初等小學。應增四百十處。按畢業後十不及一之升級。須高等小學十二處。初中等農工商業學校各一處。規畫次第建設及常年經費。列表另詳。綜約建設費三十一萬一千三百圓。常年費四十一萬七千五百圓。其餘已成者。教育會勸學宣講所博物院閱報社。現在籌辦者。蒙養院。而圖書館未暇焉。第二款爲衛生。通州之已成者。公園戒煙會施藥局。現在籌辦者。城廂之改良廁所。清潔道路。蠲除汙穢。而醫院醫學堂未暇焉。第三款爲道路工程。通州已成者。城鎮路燈。隨時因地籌辦者。建築橋梁。修繕道路。疏通溝渠。而全境改正道路。建築公用房屋。如議事會場警察局

未暇焉。第四款爲農工商務。通州已成者。三五工藝廠。州城整理商業。現在籌辦者。開設市場。籌辦水利。改良種植。而牧畜漁業。工業學堂。勸工場。改良工藝。防護青苗。整理田地。未暇焉。第五款爲善舉。通州已成者。恤嫠保節育嬰義倉。積穀救火會。義棺義塚。現在籌辦者。保存古蹟。而救貧事業。施衣施粥。貧民工藝救生會。未暇焉。第六款公共營業之電車電燈自來水。需款尤巨。不能強圖。更不暇及。此就自治範圍之內言之。凡原有之改良推廣。甫辦之繼續維持。以及籌辦而未成之事。未辦而須籌之事。約綜其數。已踰百萬。若施於地方之國家行政費最巨者。莫如警察。次則審判。事雖屬國家之政令。款亦出地方之人民。通州則巡警傳習所。巡警教練所。罪犯習藝所。先後已設。改良監獄。正在興工。將來屬地方之鎮鄉議事會。屬國家之審判警察拘留所。其建設所需約二三萬。常年經費所需約十七八萬。合籌統計。則一百二十萬圓。言乎規制。則極簡而尙多難備。言乎費用。則極省而無可再加。擇要言之。數已如此。查憲政館奏規定捐率章程第五章自治

經費第九十條。除第三款自治規約。所科罰金。懸計必不能多。其勢不敷正用。不便擬定。其第一款之公款公產。第二款之公益捐原有者。列表另詳。略當籌辦所需之數十之一二。而九十二條所定附捐特捐。附捐有不得過原徵捐稅定數十分之一之明文。卽以通州論。地丁錢糧每年銀五萬餘兩。每兩征錢二千六百文。合錢十三萬餘千。花布百貨厘捐三十萬圓上下。統以銀圓計。約四千萬圓。以十分之一計。約四萬元。僅當籌辦自治及行政所需約三十分之一耳。其胡能濟。顧猶有此十分之一之規定也。特捐須另定種類名目。將照附捐之則乎。數僅四萬。將勸募乎。勢不可強。數不可定。用卽不可恃。由是推之。九年之內。不自治不可。欲自治不能。豫備期限已第三年。更五六年。儻忽易過。我全國一千四百餘州縣。設更有如通州之竭蹶不遑枕輓不安者。達於半數。屆時政府調查。必謂我人民自治程度果不足果不足。則貽誤實行立憲。我人民將尸其咎矣。如何如何。夫地方自治經費。應取給於地方稅。準之公例。既無疑義。今豫備之第三年。則厘訂地方

稅之年期也。舊時之說主量入爲出。今日之計宜量出爲入。而非豫計出之數。何以定入之數。且地方稅必視國家稅爲比例。國家稅亦出於地方。而僅計地方自治費。而不計國家行政費。事須同時而進行。費豈可更端而請益。綢繆未雨。於事爲宜。苟有所資。不患無事。東西各國。具有成例。今略考列國之境。方里與我州縣大小相等。與其歲入之數。別列一表。爲所擬地方自治及國家行政費之數。參觀互較。以便折衷。至於原有之捐稅。必歸於國家行政費。自無待言。而仍不足。況有賠款。綴若大瘤。今既訂地方稅。亦宜並此分別清厘。俾條理明白。人民易曉。雖然。此事何事也。一國之中。此省與彼省不同。一省之中。此縣與彼縣不同。如海州境大於通州約三十倍。而每年丁漕僅一萬餘兩。崑山新陽縣境小於通州約四之一。而每年丁漕近百萬。一則以太少而難加。一則以太多而難加。一州縣能訂乎。一省能訂乎。稅則者。自治之根原。而人民之大命也。各國更定稅法。有不經國會協議者乎。待有國會而後議。待九年而後有國會。而豫備地方自治期則已過矣。

政府有說矣。凡我人民。其熟計之。顧我江蘇各州縣。按照九年籌備事項。及地方原有可計之財政。與夫需用而不足之數。分別列表。彙報諮議局。一面分寄各省。呈請各督撫代奏。請開國會。合政府及各政務大臣。詳細規定地方稅界限內之名目數目。庶衆思易集。比例亦多。自治之事。緩急先後。有所措手。不至人民坐待貽誤立憲之咎。要之籌治須財。籌財須稅。籌稅須定系統比率。定系統比率須國會。有國會而後籌備有事。無國會直無籌備可言。此固不僅爲地方自治言之也。謹議。

擬請提議照約速定裁釐加稅請祕密會議

查裁釐加稅之約。根本於辛丑約章。嗣經已定專約者。有英美日三國。旋忽中輟。久阻進行。論稅既多自棄之利權。論釐則爲無窮之害藪。攷辛丑約。原爲十二國公約。後來各定通商條約。未能萃十二國爲一團。以解決此項緊要條件。勢必各有磋磨。難於一律帖服。但自英美日三國商約定後。時越七年。竟無續定之約。磋